

Uunga siunnersuut: Illunut sanaqataaffiusunut taarsigassarsiat pillugit Inatsisartut inatsisaat nr. xx, xx. xxx 2018-imeersoq

(Ineqarnermut Attaveqaqatigiinnermullu Naalakkersuisoq)

Akissuteqaat

(Ineqarnermut Attaveqaqatigiinnermullu Naalakkersuisoq)

Pingajussaanerqarnera

Inatsisartut Sanaartornermut Ataatsimiititaliaat inatsisissatut siunnersuummut isumaliutissiissuteqarput. Naalakkersuisuniit Inatsisartut Sanaartornermut Ataatsimiititaliaat inatsisissatut siunnersuummik suliaqarneranut qutsavigaagut.

Sanaartornermut Ataatsimiititaliap pingajussaanerinnissamut isumaliutissiissutaat tunngavigalugu Naalakkersuisut pingajussaanerinnissamut allannguutissatut siunnersuummik saqqummiussipput, makkualu maluginiassaapput:

Kommunalbestyrelsip illumik sanaqataaffiusumik, pisortat illumik qularnaveeqquteqarfigisaannik utertitamik tunisinissaanut piumasaqaateqartoqassasoq, Sanaartornermut Ataatsimiititaliap kissaateqarpoq. Pisortat pigisanik aalaakkaasunik niuerfimmi unammillinnginnissaat Sanaartornermut Ataatsimiititaliamit kissaatigineqarpoq.

Ataatsimiititaliap uuma ilanngunneqarnissaa kissaatigaa: “Illunik niuernerup appasinnerusumik inissinneqannginnissaa pissutigalugu ataatsimiititaliamit kissaatigineqarpoq aalajangersakkamik ilanngussisoqarnissaanik, taamaaliornikkut pigisat nalillit tuniniarneqartillugit kommunimit illuutigineqartut toqqavii ilanngullugit nalingi ataallugit tuniniarneqannginnissaannik piumasaqaateqartoqarluni.”

Naalakkersuisut Sanaartornermut Ataatsimiititaliap isumaliutissiissummi isummersuutiminut itisiliinera pillugu qutsavigaat aammalu isummersuutit tusaatissatut tiguaat. Taakku tunngavigalugit Naalakkersuisut allannguutissatut siunnersuummik saqqummiussaqqarput. Kisiannili aalajangersakkami erseqqissaatigineqarpoq, kommunalbestyrelsip illup teknikkimut aningaasaqarnermullu tunngasortaasa nalinga inorlugu tunisnaangikkaa, naliliusseq taanna tamatigut illumut toqqaviliilluni sanaartorfissagissaanerup nalinganit qaffasinnerusussaammat.

Naalakkersuisut ukiumi tulliuuttumi kommunit suleqatigalugit suliaqqarfiup ineriartornera malinnaaffiginiarpaat, allannguneq taanna naatsorsuutiginnisamik kingunerluuteqassanersoq naliliiffiginiarlugu. Kommunit inissianik arlalinnik, illunik

sanaqataaffiusunik niueruteqarnermi akiusut inissiap teknikkimut aningaasaqarnermullu nalinganit appasinnerungaatsiarnerat peqqutigalugit tunisinnaangisaminnik piginnittunngornissaat tamatuma kingunerisinnaavaa.

Taamatutaaq piumasaaqatip aamma illunut, inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersoq aamma inissialiortiternermut tapersiissuteqartarneq pillugu Inatsisartut peqqussutaat nr. 1, 9. april 1992-imeersoq, kiisalu illunut inatsisit siusinnerusukkut atuuttuusimasut naapertorlugit sananeqarsimasunut atuutsinneqarnissaa Sanaartornermut Ataatsimiititaliap kissaatigaa.

Naalackersuisut piaarnerpaamik inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersumut allannguutissatut siunnersuummik saqqummiussiniarput.

Naggasiutigalugu erseqqissaatigerusuppara, siunnersuut taanna inuiaqatigiinni naligiinnermik annertusititseqataasussaammat, nunaqarfinni illoqarfinnilu minnerni isertitakitsut akunnattumillu isertitallit inissianik imminnut pilersornissaannut periarfissanik pitsaanagerusunik pilersitsiviusussaammat. Siunnersuut taanna inuunermi atukkat pitsaanerulernerinut, aammalu ilaqutariit ataasiakkaat toqqissisimanissaannik qaffaanissamut qulakkeerinneqataasussaavoq. Taamaattumik Inatsisartut siunnersuut tigulluarumaaraat, taamaalillunilu illulioqataasunut pissutsit nutaat atuutilerumaartut Naalackersuisunit neriutigineqarpoq.

Taamatut oqaasertalerlugit Naalackersuisut immikkoortoq Inatsisartuni kajumittumik suliaasangorlugu tunniuppaat.